

## REGLUGERÐ

### um búfjárhald í Akraneskaupstað.

#### 1. gr.

Búfjárhald (nautgripa, hrossa, svína, sauðfjár, geita, loðdýra og alifugla) er bannað í kaupstaðnum nema með leyfi bæjarstjórnar að uppfylltum eftirfarandi skilyrðum:

- a) Búfjáreigendur skulu jafnan hafa fullnægjandi aðstöðu til að halda búfé, bæði hvað varðar húsakost og fóður. Þeir skulu gæta þess að fjöldi búfjár þeirra sé innan þeirra marka, sem bæjarstjórn hefur tiltekið í leyfi sínu. Forðagæslumenn skulu fylgjast með því að reglur þessar séu haldnar.
- b) Bæjarstjórn getur ákveðið, að búfjáreigendur skuli árlega greiða leyfisgjald fyrir búfé sitt. Bæjarstjórn ákveður fjárhæð gjaldsins, og skal hún miðuð við, að bæjarsjóður beri ekki kostnað af búfjárhaldi í kaupstaðnum. Þar að auki skulu búfjáreigendur standa straum af öllum kostnaði, sem bæjarfélagið kann að verða fyrir vegna búfjárins.
- c) Aðbúnaður búfjár og meðferð þess skal jafnan vera í fyllsta samræmi við ákvæði laga um búfjárrækt og dýravernd. Þá er búfjáreigendum skylt að hlíta hvers konar fyrirætlum um hreinlæti og heilbrigðishætti.
- d) Búfé skal ávallt vera í öruggri vörslu búfjáreigenda. Þeir bera fulla bótaábyrgð á öllu því tjóni, sem búfé þeirra kann að valda.
- e) Ef breyting verður á eignarhaldi búfjár, fellur undanþáguleyfið úr gildi, og ber að gera bæjarstjórn grein fyrir því.

#### 2. gr.

Leyfi til búfjárhalds skuldbindur bæjarstjórn ekki til þess að sjá leyfishöfum fyrir beitolandi handa búfé, girða innan marka bæjarins né veita þeim aðra aðstöðu til búfjárhaldsins. Þó skal bæjarstjórn láta gera búfjárhelda girðingu umhverfis þéttbýlishverfi kaupstaðarins og halda henni við.

#### 3. gr.

Ef búfé gengur laust í kaupstaðnum, skal lögregla hlutast til um það með tilstyrk bæjarstjórnar, að það sé handsamað og fært til geymslu á vegum bæjarins. Sé búfénaður ekki leystur út innan viku gegn greiðslu kostnaðar og bóta vegna tjóns, sem hann kann að hafa valdið, skal hann seldur á opinberu uppboði eða honum slátrað. Allan kostnað af þessum aðgerðum skulu búfjáreigendur greiða. Jafnframt skulu þeir eða umráðamenn ágangsfénaðar sæta sektum, ef rekja má ágang búfjár til vanrækslu þeirra.

#### 4. gr.

Við brot á skilyrðum fyrir undanþágu til búfjárhalds er bæjarstjórn heimilt, hvenær sem er að afturkalla leyfið, enda hafi leyfishafi ekki skipast við undangengna aðvörun. Bæjarstjórn er heimilt að afturkalla leyfi, eitt eða fleiri, telji hún þess þörf.

#### 5. gr.

Sé búfé haldið án heimildar skal búfjáreigandi sviptur vörslu þess og það selt á opinberu uppboði eða því slátrað. Allan þann kostnað, sem af þessu hlýst, skulu búfjáreigendur greiða.

Reglugerð þessi sem samin er og samþykkt af bæjarstjórn Akraneskaupstaðar staðfestist hér með samkvæmt lögum nr. 44 frá 23. maí 1964 um búfjárhald í kaupstöðum og kaupturnum til þess að öðlast gildi þegar í stað.

*Félagsmálaráðuneytið, 7. desember 1984.*

F. h. r.  
**Hallgrímur Dalberg.**

*Hólmfríður Snæbjörnsdóttir.*

## LÖGREGLUSAMÞYKKT

fyrir Ísafjarðarkaupstað.

### I. KAFLI

#### Um reglur og velsæmi á almannafæri.

##### 1. gr.

Uppþot eða óspektir mega ekki eiga sér stað á almannafæri. Ekki mega menn þyrpast saman á almannafæri, svo að til tálma sé fyrir umferð eða til óþæginda fyrir vegfarendur. Með almannafæri er átt við vegi og svæði, sem almenningur fer um og ætluð eru til almenningsafnota. Um samkomuhús og opinberar stofnanir gilda ákvæði samþykktar þessarar um almannafæri, eftir því sem við á.

##### 2. gr.

Þegar fjölmenni safnast saman á almannafæri í því skyni að sinna lögmætum erindum, skal ráða sér þannig, að þeir, sem fyrstir koma, fái fyrstir afgreiðslu, og haga sér í öllu eftir þeim fyrirmælum, sem lögreglan eða umsjónarmaður setur til að viðhalda góðri reglu.

##### 3. gr.

Þeir sem hyggjast efna til útifunda eða fara í hóp göngur, skulu tilkynna það lögreglustjóra með hæfilegum fyrirvara. Tilkynningu um hóp göngu skal fylgja nákvæm lýsing á fyrirhugðum gönguleiðum, og er lögreglustjóra heimilt að breyta þeim á hvaða stigi sem er, ef hann telur brýna nauðsyn til.

##### 4. gr.

Á almannafæri má ekki fljúgast á né hafa í frammi hávaða eða annars konar háttalag, sem veldur ónæði eða raskar allsherjarreglu. Óheimilt er að þeyta hátalara eða hafa hljómflutningstæki svo hátt stillt, að það valdi ónæði og truflun. Í kirkjugörðum ber að virða grafarhelgi í hvívetna og fara þar hljóðlega um.

##### 5. gr.

Enginn má klæðast né hegða sér þannig á almannafæri, að hann misbjóði almennu velsæmi.

##### 6. gr.

Bannað er að raska næturró manna að óþörfu. Enginn má að ófyrirsynju berja á dyr eða glugga, hringja dyrabjöllum eða hafast neitt það að, sem valdið getur ónæði eða ótta.